

Manfred Zirkelbach

MaZi-Ned auszudenke

Vodderdooch on die Walleüt.

Des is scho ganz schöne ostrengend, wann mer senn Vodderdooch so ganz richdich on standesgemäß feier will. No, ich hob des am letzt Donnerschdich zu allererschd ganz ruhich olaff läss on bin, wie sich des gehört, am Vodderdooch in aller Herrgotts Früh nei die Kerrich gange.

Dass onner Kerrichsöwere so richdich off die Höh vo die Zeid sinn, hadd dann onner Pfarr in sei Predicht dann aach ganz klor räusgestelllt. „E ganz hoher Feierdooch is heut“ hadder gsochd, wäll där Himmelfohrdsdooch ein „Aufbruch“ für die ganze Menschheit gewaast is. On där Aufbruch wär aach do dro zu senn, wäll o dem Dooch aach ville Bittprozessionen on Flurgäng obgehalle werrn.

Wie ich dehemm wor on des Radio omach, hör ich ned rachd, wäll där Moderator off Bayern 1 noch en draufsetzt on mir weismach will, dass aüs däre Flurgäng die Vodderdoochsdraditio mid Bollerwöchelich on Bierkäste droff entstanne sei soll. „No“, hoo ich zu mei Gertrud gsööt, „des will ich doch e moal kontrollier, ob des aach alles so passt, was mir do heüt so alles erzählt worn is“. Zu onnere Studienexkursion hömmer ons nochmiddochs off den Waach nauf den Kreuzberch gemochd on was sooch ich eüch? Där Himmelfohrdsdooch is wahrlich zum regelrechte Himmelfohrtskommando worn on zwösche Neüstädter Haus, Gemündner Hütte on Kreuzberch hob ich dann aach gsenn, was onner Pfarr mid „Aufbruch“ gemeent hadd on aach där Radiomensch mid sei Flurgäng scheint gor ned so falsch gelaache ze hömm. Einzelnen, zu zwett, manchmoal zegor klenne Prozessionen sinn ons entgeche komme. „Siegside Fraa, lauder fromme Leüt onnerwaachs“. „Wieso?“ „No, die singe die höchsde Tön on die Aache leüchde, lauder Walleüt“. „On wu dro siegsd du des?“ „No guck doch hie, jeder hadd e Fahne“.

Ned auszudenke